

## Christliche Tauffpredigt.

giebet vns das zu bedencken/ 1. Joh. 3. v. 1. Sehet/ welche eine Liebe hat vns der Vater erzeiget/ daß wir Gottes Kinder heißen. Vnd Paulus Rom. 8. v. 17. Sind wir denn Kinder/ so sind wir auch Erben/ nemlich Gottes Erben vnd Mitserben Christi. Aus dem allen hören vnd verstehen wir/ welche grosse Werck bey vnser Tauffe geschehen/ vnd wie hoch wir vns derselben zu trösten vnd zu erfreuen haben. Sehe einer nun hin vnd verachte vns vnser Tauffe/ vnd spreche/ Sie sey nichts werth/ oder dencke was eine Handvoll Wasser so grosse dinge thun sol/ Da wir hören hier/ wie vber solchem Kind/ das getaufft wird/ der Himmel sich auffthut/ der heilige Geist hernieder fehret/ vnd Gott der himlische Vater es für seinen lieben Sohn vnd Tochter austruffet/ vnd seinen Namen/ der ihm in der Tauffe geben wird/ in das Buch des Lebens einverzeichnet. Zwar wenn vns Gott die Augen auffthun wolte/ so würden wir solches mit verwunderung bey allen Tauffen selbst sehen/ Aber selig seyn die nicht sehen vnd doch glauben/ Joh. 20. v. 29. Wann einer nur allein auff Wasser vnd die geringe Person/ so da teuffet/ sehen wil/ so hat es kein sonderlich ansehen/ vnd meynet einer nimmermehr/ daß das Wasser solche grosse dinge thun solte/ vnd gehet einem wie dem Feldheuptman Naeman/ 2. Reg. 5. v. 11. Da er sich im Jordan waschen solte/ wenn er wolte des Aussatzes loß seyn/ Aber da heisset es/ wie wir singen:

Das Aug allein das Wasser sieht/  
Wie Menschen Wasser giessen/

Der